

06/06/1998

Kit Siang amal nepotisme: Mahathir

KUALA LUMPUR, Jumaat - Datuk Seri Dr Mahathir Mohamad menyifatkan Setiausaha Agung DAP, Lim Kit Siang mengamalkan nepotisme dengan mengutamakan kepentingan anggota keluarga sendiri daripada parti.

Menurut Perdana Menteri, amalan itu terbukti apabila Lim memilih anaknya sendiri sebagai timbalannya.

"Ini satu jenis nepotisme, dia pilih anak dia sendiri sebagai penolongnya. Nampaknya Kit Siang bukan utamakan parti DAP, tapi utamakan keluarganya. Kalau orang lain buat, dia kata nepotisme."

"Tapi belum pun jadi kerajaan, sudah bagi tempat kepada anaknya. Kalau jadi kerajaan, isterinya, anaknya masuk dalam Kabinet," katanya kepada pemberita setibanya dari Jepun di Lapangan Terbang Antarabangsa Sultan Abdul Aziz Shah, petang ini.

DAP semalam mengumumkan tindakan menggantung jawatan naib pengerusi kebangsaan Liew Ah Kim dan bendahari parti Fung Ket Wing serta memecat Wee Choo Keong daripada jawatan setiausaha publisiti kerana dikatakan mengkritik tindakan Lim berhubung kes mahkamah anaknya, Guan Eng, baru-baru ini.

Ketiga-tiganya juga dilaporkan tidak berpuas hati dengan ceramah seluruh negara yang dianjurkan oleh Lim bagi menagih simpati rakyat terhadap Guan Eng yang dihukum penjara 36 bulan kerana kesalahan menghasut orang ramai dan menerbit berita palsu.

Dr Mahathir berkata, Lim sejak dahulu lagi mengamalkan nepotisme apabila meletakkan anaknya sebagai calon di kawasan yang beliau pernah bertanding.

"Sudah wujud ciri-ciri nepotisme, hampir serupa dengan kronisme," kata Perdana Menteri.

Lim Guan Eng adalah Timbalan Setiausaha Agung DAP selain menerajui kepimpinan pemuda dalam parti pembangkang utama itu.

Dr Mahathir menyifatkan perbuatan menggunakan isu Guan Eng untuk memburuk-burukkan negara dan sistem perundangan tidak sepatutnya dibuat, walaupun oleh parti lawan.

(END)